



Inatsisartut Ombudsmandiata 2024-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

(Inatsisinut ataatsimiititaliaq)

(siullermeerneqarnera aappassaaneerneqarneralu)

Demokraatit siullermik Ombudsmandi qutsavigerusuppaat suliaanut aammalu 2024-imut ukiumoortumik nalunaarutaanut peqqissaarussamut. Ombudsmandip sulinera tamat oqartussaaqataanerannik sulinitinni toqqammavileeqataavoq. Suliaq taanna aqutigalugu, inuiaqatigiittut qulakkeerparput, innuttaasut inatsisitigut illersorneqarnerisa paarilluarneqarnissaat, aammalu pisortat allaffeqarfiata inatsisit atuuttut allaffissornikkullu periutsit, innuttaasunik illersuisussat malinneqarnersut.

Nalunaarusiap ersarissumik takutippaa, sammisani arlaqartuni suli unamminartoqartoq. Pingaartumik suliat suliarisarnerannut piffissarititaasut allattuinnissamillu pisussaatitaanerit ernumalersitsipput. Innuttaasut pisortanut saaffiginnikkaagata, ajornartorsiuteqarnermik aallaaveqakkajuppoq, taamaattumillu pingaaruteqarluinnarluni, suliat piaarnerpaamik, peqqissaartumik eqqotumillu suliarineqarnissaat. Piffissaliussat malinneqarnissaat allattuinnissamillu pisussaatitaanerit allaffissornikkut piumasarineqaannangillat, tunngaviusumilli piumasaqaataallutik, qulakkeerinnettussat, immikkoortortaqaarfik ammasumik, akisussaassuseqartumik aammalu innuttaasut pisinnaatitaaffiinik ataqqinnittumik sulinissaanut.

Demokraatit Ombudsmandip isumakuluutaa isumaqatigaat, suli pisoqartarmat, innuttaasut saaffiginninneri ima pineqarlutik, nikassaasutut naammanngittutullu misigineqartarlutik. Tamanna eqqaasitsissutaavoq, oqartussat innuttaasullu akornanni naapinnerit pisassasut ataqqinninnermik pikkorissutsimillu aallaaveqarnissaannik. Pisortani oqartussat eqqaamassavaat, innuttaasunik sullissigamik, aammalu pitsaasumik ataqqinnittumillu isummersorneq inuiaqatigiinni tatigineqartuni qitiummat.

Tassungalu ilutigalugu ilisimavarput, sulisussarsiorneq sulisooreersunillu tigumminninniarneq suli unamminartinneqartoq. Minnerunngitsumik tamanna pisarpoq kommunini immikkoortortaqaarfinni. Aammali uani imaappoq, sulisunik amigaateqarneq utoqqatsissutissaassanngitsoq, innuttaasut inatsisitigut pisinnaatitaaffiisa sumiginnarnissaannut. Akerlianilli piffissani taakkunanerpiaq ulapiffinni sulisussaaleqiffinnilu, ersarissunik malittarisassiornissaq pisariaqartinneqarpoq aamma allaffissornikkut iliuutsit pitsaasut suli pingaarnerulerlutik.

Demokraatit suliniutit, pitsanngorsaatisatut iliuuserineqalereersut ilalernartippaat. Soorlu ilaatigut Ombudsmandip aqutissiuussinnermut suliaa aammalu pitsaasumik sullissinissamut ileqqussatut sakkussanut nutaanut tapersiineq. Sakkut taakku sullissisunut aqutsisunullu iluaqutaasorujussuupput



atorluarneqartariaqarlutillu kommunini aammalu qitiusumi allaffeqarfimmi.

Aamma erseqqissaatigerusupparput, pingaarluinnarmat, pisortat oqartussaasuisa Ombudsmandip isornartorsiutaanik pimoorussinissaat innersuussutaalu tunniunneqartut, malissagaat. Aatsaat taamaasiornikkut, sullissinermik sunniuteqarluarnerusumik inatsisitigullu illersuilluarnerusumik pilersitsinnaavugut, innuttaasut tatigalugu, suliaakkiissutimik eqqortumik aammalu ataqqinartumik suliarineqarnera qulakkiissappassuk.

Demokraatit taamaattumik taperserpaat, Ombudsmandip 2024-imut nalunaarusiaata tusaatissatut tiguneqarnissaa, aammalu tassunga ilutigalugu suliamut pingaarutilimmut pitsaasumik sulisimaneranut nersoratsigu, innuttaasunut iluaqutaasussamik suliaasumut aammalu inuiaqatigiit tamarmik pisortanut tatiginninnissaat siunertaralugu sulisumut.